

藥師瑠璃光七
佛本願功德經

戴傳賢敬署



民國二十二年

一月護國濟民

弘法利生藥師

七佛法會敬印

護國濟民
弘法利生
藥師七佛法會緣起

國難日深，民生日迫，外有封豕長蛇之荐食，內有天災人禍之紛乘，逢此百罹曷綏，萬衆顧念釀成苦果，統出業因，惟造作之孽滋多，斯變現之凶靡已欲除，衆難須讎，前非佛法無邊，卜天心之可挽，樂林不遠，豈世運之難回，維我三世諸佛行菩薩道時，各有誓願，如釋迦文佛有五百願，阿彌陀佛有四十八願，等等所昭宣，莫不妙契三祇，期引窮子於功德之海，相圓百劫誓爲愚生降煩惱之魔而最當今日之機，克援羣黎之溺者，尤莫如藥師七佛之本願，了無剩語，足破微塵，此同人所以有藥師七佛法會之發起也。然而福緣善慶道在人，弘其積不厚，其負無力，護國宣化廣慧大師班禪額爾德尼者，承宗喀巴之真傳，久弘密教，荷釋迦文之大業，普濟含靈，緇錫來儀，灑楊枝而欲遍津梁，未倦

啓榆櫨以精搜鑒於同仁三請之誠允主藥師七佛之會感勝緣之非偶擴代
難逢移講樹而未遙真詮不昧所期諸上善人聞風隨喜或列法席共聆圓音
或入道場靜參秘旨或各在家虔誦藥師七佛本願經矢志旣誠呈功自偉虔
祝四天之下萬彙咸蘇仰慧日之高懸重昏夜曉叨慈雲之普蔭火宅生涼庶
躋斯世於隆平邦國與瑠璃並耀佇接疲氓於歡喜旄倪慶衽席同登謹啓

發願文

中華民國二十二年元月吉日四衆弟子等敬以至誠虔請

護國宣化廣慧大師於南京城東寶華山之

護國聖化隆昌寺修建

護國濟民弘法利生藥師七佛道場正心誠意齋戒沐浴順

大師之羯磨荷

諸佛之垂慈敬禮

慈悲護世十方三世常住三寶 敬禮

如來應供正徧知明行足善逝世間解無上士調御丈夫天人師藥師淨琉璃
光王佛

發願文

善名稱吉祥王佛

寶月智嚴光音自在王佛

金色寶光妙行成就佛

無憂最勝吉祥王佛

法海雷音佛

法海勝慧遊戲神通佛 敬禮

淨琉璃世界一切佛菩薩 敬禮

本師釋迦牟尼佛 敬禮

顯揚正法結集羣經大迦葉尊者

繼弘正法多聞總持阿難尊者

精嚴戒律護持正法優波離尊者 敬禮

重光正教護國濟民黃教宗師宗喀巴祖師

道場法主護國宣化廣慧大師 敬禮

十方大德清淨聖衆 敬禮

中華民國父民國開國大總統孫中山先生

中國歷代聖賢

既敬禮已乃於十方常住三寶證盟之前同心同口而發願曰

一願民國人民信仰堅固確實信行忠孝仁愛信義和平八德相待以誠相接
以禮表裏如一心口相應團結一致永遠不渝

二願民國人民刻苦自勵克勤克儉富者濟人以財智者濟人以道財不令藏
於地學不令私於身營共同之事業成共同之社會

三願民國人民愛護國家服務公衆實行主義守法奉公俾約法能行憲法早

布國基鞏固政法修明

四願青年男子回心轉進意德修業堅其意志強其身體修其言行廣其智識力矯浮佻之時弊作真實之工夫養成耐勞苦守紀律之性行俾在家爲克家之子弟在社會爲有用之人才在國爲忠實之人民然後方能爲國爲民擔當大事

五願青年女子一齊覺悟特宜養其慈愛和平之純德治家教子之常識爲妻爲母保育後代民族之生存發展責任端在於女性同胞盡其天賦之職責發揮其自然之良能俾社會受慈育之恩萬代沾祥和之德方爲愛國愛民愛護人類愛護國族之正道

六願一切壯年人民努力修爲不貽少年老年以憂患辛苦之境遇在官者廉潔奉公營業者誠實任事劾苦忍耐勇猛精進上承先德下啓後人

七願中國國民黨全體同志親愛精誠團結一致拋棄嫌怨互相扶持念先烈創業之艱難知國民責善之殷重虛心平氣矢志忠奉行主義努力建設納全國之忠言容全國之人才以盡其救國之責成其建國之功

八願國民政府上自主席下迄僚屬中央地方文武官吏履行誓言奉行法令廉潔勤慎愛國如家體

總理天下爲公之心繼

先烈捨身救國之志於權利則盡量忍讓於責任則奮勇承擔忠於國家愛護人民容納賢能接受忠告提攜後進尊重前賢共濟時艱同成大業

九願全國同胞漢滿蒙藏及以回疆乃至西南諸省山間民族共存天下爲公之大心同發團結國族之大願以三民主義爲依歸則共信斯立以忠信篤敬律言行則互信以固分多潤寡人人存乎慈悲截長補短事事行於方便

同心同德並育並行復興富強安樂之中華有志竟成造成盡善盡美之民國後來居上

十願世界各國政府人民共立互助之志同棄凌暴之心扶持弱小之民族建立共守之法治繼絕舉廢治亂持危厚往薄來協和共濟

十一願佛教大眾澈底覺悟發大乘心行普度事勿作了之人勿泥文字之迹勿迷於外道邪魔而自犯毗尼勿惑於世俗財位而妄爲趨附勿迷於鬼神而遺棄衆生勿迷於成規而阻礙進步勇猛精進自覺覺人悲智雙運財法兼施布十善於俗界行六度於道門持戒則如山岳之堅度生則如河海之廣恢復固有之教義則本體自是金剛善用世間之科學則法器悉爲輪寶然後

釋迦教義根基鞏固枝葉繁榮法輪常轉佛日增輝

十二願大慈大悲藥師世尊運無緣慈施無畏法愍念衆生普垂加被使人人覺悟共發至誠懺既往之夙業種當來之善果一切煩惱災障消除無餘村城國邑布滿佛號經聲大地山河盡成琉璃世界千秋萬世善業昭垂四海五洲仁風永被中華鞏固民國萬年萬邦協和正法永住爲滿本願
誓遵

世尊藥師淨琉璃光王如來本願如實奉行

第一遵行 世尊本願政本優生教重安養使一切人民身心善美相好

端嚴

世尊第一本願如實成就

第二遵行 世尊本願培植德本發揚慧力使一切人民本力充實光輝

普耀

發願文

世尊第二本願如實成就

第三遵行 世尊本願廣行四攝勤修六度使一切人民自他方便萬事

咸宜

世尊第三本願如實成就

第四遵行 世尊本願服務社會盡瘁人羣使一切人民咸歸大乘捨身

救世

世尊第四本願如實成就

第五遵行 世尊本願精嚴戒律調伏身心使一切人民身口意業咸歸

清淨

世尊第五本願如實成就

第六遵行 世尊本願政重衛生業勵醫藥使一切人民凡有疾苦悉得

救治

世尊第六本願如實成就

第七遵行 世尊本願普設醫院廣施藥品使一切人民孤苦貧窮悉離

病厄

世尊第七本願如實成就

第八遵行 世尊本願立法施政尊重女性使一切女子受平等福離百

惡惱

世尊第八本願如實成就

第九遵行 世尊本願樹立正法降伏邪見使一切正法並育並行永離

腐惡

世尊第九本願如實成就

發願文

第十遵行 世尊本願改良刑政實施感化使一切人民不觸法網卽有犯者在獄獲教出獄獲養

世尊第十本願如實成就

第十一遵行 世尊本願政重民生普濟民食使一切人民飲食供給無有乏少更施教育培其智德令住安樂不遭苦難

世尊第十一本願如實成就

第十二遵行 世尊本願衣住行等一切政策決依

總理遺教盡利推行生產分配咸令得宜使一切人民生活所需無有不足節之以禮和之以樂五福俱全文明鼎盛

世尊第十二本願如實成就

自誓之後四衆弟子願竭身心力求實現惟願佛慈加彼普羣羣攝機同生淨

琉璃莊嚴世界

頌曰

世尊藥師琉璃光
曾發弘深十二願
慈悲喜捨無窮盡
普令衆生得安樂
惟我國父孫先生
爲能善體諸佛意
世出世間法雖異
真如實相無有二
建國首要重民生
行易知難成智慧
財法二施悉平等
信解行證悉圓滿
惟願佛慈垂加被
融通二諦悉成就
惟願正法常熾盛
普令有情得安樂
無明煩惱總消除
速成無上菩提道

發願文

發願文

大地盡現琉璃光

百千萬劫常遍照

一三

請修藥師七佛法事齋主

以姓氏筆畫多少爲序

王震

王柏齡

王右瑜

方振武

方聲濤

巴文峻

石青陽

朱福南

沁布多爾濟

李德源

多爾濟

克興額

居正

余文華

賀喜業勤圖墨爾根

林翔

周仲良

易宗昌

柏文蔚

唐生智

恩克巴圖

陳炳光

陳敬修

陳澤普

夏慈仁

夏之時

郭爾卓爾札布

請修藥師七佛法事齋主

請修藥師七佛法事齋主

黃 實

黃慕松

黃懺華

康寄遙

許崇灝

許炳堃

梅光羲

張 繼

張希騫

賀耀組

楊樹莊

葉恭綽

葉 荃

楚明善

趙丕廉

德穆楚克棟魯普

蔣肇成

劉家駒

歐陽葆真

戴傳賢

鍾蘇郎

羅桑楚臣

羅桑堅贊

謝百城

謝 健

謝楊德固

藥師瑠璃光七佛本願功德經卷上

唐三藏法師義淨奉詔譯

如是我聞一時薄伽梵遊化諸國至廣嚴城在樂音樹下與大苾芻衆八千人俱菩薩摩訶薩三萬六千其名曰曼殊室利菩薩觀自在菩薩慈氏菩薩善現菩薩大慧菩薩明慧菩薩山峯菩薩辯峯菩薩持妙高峯菩薩不空超越菩薩微妙音菩薩常思惟菩薩執金剛菩薩如是等諸大菩薩而爲上首及諸國王大臣婆羅門居士天龍八部人非人等無量大衆恭敬圍繞而爲說法初中後善文義巧妙純一圓滿清淨鮮白梵行之相示教利喜皆令具足微妙行願趣大菩提爾時曼殊室利法王子菩薩摩訶薩承佛威神從座而起偏袒右肩右膝著地合掌恭敬而白佛言世尊今有無量人天大衆爲聽法故皆已雲集唯

佛世尊從初發意乃至於今所有無量塵沙數劫諸佛刹土無不知見願爲我等及未來世像法衆生慈悲演說諸佛名號本願功德國土莊嚴善巧方便差別之相令諸聞者業障消除乃至菩提得不退轉

爾時世尊讚曼殊室利菩薩言善哉善哉曼殊室利汝以大悲愍念無量業障有情種種疾病憂悲苦惱得安樂故勸請我說諸佛名號本願功德國土莊嚴此由如來威神之力令發斯問汝今諦聽善思惟之當爲汝說曼殊室利言唯願爲說我等樂聞佛告曼殊室利東方去此過四殞伽河沙佛土有世界名曰無勝佛號善名稱吉祥王如來應正等覺明行圓滿善逝世間解無上丈夫調御士天人師佛世尊有無量億衆不退菩薩之所圍遶安住七寶勝妙莊嚴師子之座現在說法曼殊室利彼佛國土清淨嚴飾縱廣正等百千踰繕那以瞻部金而爲其地平正柔輭氣如天香無諸惡趣及女人名亦無瓦礫沙石棘刺

寶樹行列華果滋繁多有浴池皆以金銀真珠雜寶而爲砌飾曼殊室利彼國菩薩皆於七寶蓮華化生是故淨信善男子善女人皆當願生彼佛國土曼殊室利彼佛如來應正等覺從初發心行菩薩道時發八大願云何爲八

第一大願願我來世得無上菩提時若有衆生爲諸病苦逼切其身熱病諸瘧蟲道魘魅起屍鬼等之所惱害若能至心稱我名者由是力故所有病苦悉皆消滅乃至證得無上菩提

第二大願願我來世得菩提時若有衆生盲聾瘖癡白癩癲狂衆病所困若能至心稱我名者由是力故諸根具足衆病消滅乃至菩提

第三大願願我來世得菩提時若有衆生爲貪瞋癡之所纏逼造無間罪及諸惡行誹謗正法不修衆善當墮地獄受諸苦痛若能至心稱我名者由是力故令無間罪及諸業障悉皆消滅無有衆生墮惡趣者常受人天殊勝安樂乃至

菩提

第四大願願我來世得菩提時若有衆生少乏衣食瓔珞臥具財貨珍寶香華伎樂若能至心稱我名者由是力故所乏資生皆得充足乃至菩提

第五大願願我來世得菩提時若有衆生或被枷鎖繫縛其身及以鞭撻受諸苦惱若能至心稱我名者由是力故所有苦惱皆得解脫乃至菩提

第六大願願我來世得菩提時若有衆生於險難處爲諸惡獸熊羆師子虎豹豺狼蝮蛇蝮蝎之所侵惱欲斷其命發聲大叫受此苦時若能至心稱我名者由是力故所有恐怖皆得解脫諸惡獸等悉起慈心常得安樂乃至菩提

第七大願願我來世得菩提時若有衆生鬥諍言訟因生憂惱若能至心稱我名者由是力故鬥訟解散慈心相向乃至菩提

第八大願願我來世得菩提時若有衆生入於江海遭大惡風吹其船舫無有

洲渚而作歸依極生憂怖若能至心稱我名者由是力故皆得隨心至安隱處受諸快樂乃至菩提曼殊室利是謂彼佛如來應正等覺行菩薩道時所發八種微妙大願又彼世尊從初發心常以定力成就衆生供養諸佛嚴淨佛土菩薩眷屬悉皆圓滿此之福德不可思議一切聲聞及諸獨覺縱經多劫說不能盡唯除如來補處菩薩曼殊室利若有淨信男子女人若王大臣長者居士心希福德斷諸煩惱稱彼佛名讀斯經典於彼如來至心尊重恭敬供養所有一切罪惡業障及諸病苦悉皆消滅諸有願求無不隨意得不退轉乃至菩提復次曼殊室利東方去此過五菟伽河沙佛土有世界名曰妙寶佛號寶月智嚴光音自在王如來應正等覺有無量億菩薩圍繞現在說法皆演大乘微妙深義曼殊室利彼佛如來從初發心行菩薩道時發八大願云何爲八

第一大願願我來世得菩提時若有衆生爲營農業及商賈事令心擾亂廢修

菩提殊勝善法於生死中不能出離各各備受無邊苦惱若能至心稱我名者由是力故衣服飲食資生之具金銀珍寶隨願充足所有善根皆得增長亦不捨離菩提之心諸惡道苦咸蒙解脫乃至菩提

第二大願願我來世得菩提時於十方界所有衆生若爲寒熱飢渴逼身受大苦惱若能至心稱我名者由是力故先世罪業悉皆消滅捨諸苦惱受人天樂乃至菩提

第三大願願我來世得菩提時於十方界若有女人貪姪煩惱常覆其心相續有娠深當厭惡臨當產時受大苦惱聞我名字暫經其耳或復稱念由是力故衆苦皆除捨此身已常爲男子乃至菩提

第四大願願我來世得菩提時若有衆生或與父母兄弟姊妹妻子眷屬及諸親友行險難處爲賊所侵受諸苦惱暫聞我名或復稱念由是力故解脫衆難

乃至菩提

第五大願願我來世得菩提時若有衆生行於暗夜作諸事業被惡鬼神之所惱亂極生憂苦暫聞我名或復稱念由是力故從暗遇明諸惡鬼神起慈悲意乃至菩提

第六大願願我來世得菩提時若有衆生行鄙惡事不信三寶智慧鮮少不修善法根力覺道念定總持皆不修習若能至心稱我名者由是力故智慧漸增三十七品悉皆修學深信三寶乃至菩提

第七大願願我來世得菩提時若有衆生意樂鄙劣於二乘道修行而住棄背無上勝妙菩提若能至心稱我名者捨二乘見於無上覺得不退轉乃至菩提第八大願願我來世得菩提時若有衆生見劫將盡火欲起時生大憂怖苦惱悲泣由彼前身惡業力故受斯衆苦無所歸依若能至心稱我名者所有憂苦

悉皆消滅受清涼樂從此命終於我佛土蓮華化生常修善法乃至菩提曼殊室利是爲彼佛如來應正等覺行菩薩道時所發八種微妙大願又彼如來所居佛土廣博嚴淨地平如掌天妙香樹而爲行列天華遍覆天樂常鳴天妙鈴鐸隨處懸布天寶莊嚴師子之座天寶砌飾諸妙浴池其地柔軟無諸瓦礫亦無女人及諸煩惱皆是不退諸菩薩衆蓮華化生若起念時飲食衣服及諸資具隨意現前是故名爲妙寶世界曼殊室利若有淨信男子女人國王王子大臣輔相中宮嫔女晝夜六時慳重至心恭敬供養彼佛世尊及稱名號并造形像香華音樂燒香末香塗香而爲奉獻清淨嚴潔於七日中持八戒齋於諸衆生起慈悲意願生彼土彼佛世尊及諸菩薩護念是人一切罪業悉皆消滅無上菩提得不退轉於貪恚癡漸得微薄無諸病苦增益壽命隨有希求悉皆如意門諍怨家咸生歡喜捨此生已往彼刹土蓮華化生當生之時念定總持悉

皆明了曼殊室利如是當知彼佛名號無量功德若得聞者所願皆成

復次曼殊室利東方去此過六劫伽河沙佛土有世界名曰圓滿香積佛號金色寶光妙行成就如來應正等覺有無量億萬菩薩圍繞現在說法曼殊室利彼佛如來從初發心行菩薩道時發四大願云何爲四

第一大願願我來世得菩提時若有衆生造作種種屠害之業斷諸生命由斯惡業受地獄苦設得爲人短壽多病或遭水火刀毒所傷當受死苦若聞我名至心稱念由是力故所有惡業悉皆消滅無病長壽不遭橫死乃至菩提

第二大願願我來世得菩提時若有衆生作諸惡業盜他財物當墮惡趣設得爲人生貧窮家乏少衣食常受諸苦若聞我名至心稱念由是力故所有惡業悉皆消滅衣服飲食無所乏少乃至菩提

第三大願願我來世得菩提時若有衆生更相陵慢共爲讎隙若聞我名至心

稱念由是力故各起慈心猶如父母乃至菩提

第四大願願我來世得菩提時若有衆生貪欲嗔恚愚癡所纏若出家在家男女七衆毀犯如來所制學處造諸惡業當墮地獄受諸苦報若聞我名至心稱念由是力故所有惡業悉皆消滅斷諸煩惱敬奉尸羅於身語心善能防護水不退轉乃至菩提曼殊室利是爲彼佛如來應正等覺行菩薩道時所發四種微妙大願曼殊室利又彼如來所居佛土廣博嚴淨地平如掌皆以寶成常有香氣如妙栴檀復以香樹而爲行列天妙珠瓔摩尼等寶處處垂下多有浴池天寶嚴飾香水盈滿衆德皆具於其四邊懸妙繪綵街衢八道隨處莊嚴所有衆生無諸煩惱及憂悲苦亦無女人多是住地諸菩薩衆勝妙音樂不鼓自鳴演說大乘微妙深去有衆生聞此音者得不退轉無上菩提曼殊室利彼佛如來由昔願力善巧方便成就佛土圓滿莊嚴坐菩提座作如是念於未來世若

有衆生爲貪瞋癡之所纏繞衆病所逼怨家得便或時橫死復由惡業墮地獄
中受大劇苦彼佛見此苦惱衆生爲除業障說此神呪令彼受持於現世中得
大利益遠離衆苦住菩提故卽說呪曰

咄姪他 悉睇悉睇 蘇悉睇 謨折你 木刹你 日帝毗日帝 菴末麗

毗末麗忙揭例 調囑若揭鞞 曷喇咄娜 揭鞞薩婆頰他 婆但你

鉢囉摩頰他 娑但你 末捺細 莫訶末捺細 頰步帝 頰窣步帝 毗

多婆曳 蘇跋泥去 跋囉蚶摩 瞿史去 跋囉蚶摩 杜使帝 薩婆頰

剃數 阿鉢囉市帝 薩跋咄囉 阿鉢喇底嚧帝 折覩薩瑟檄 敦陀俱

胝 婆使帝 細摩薩婆 但他揭多喃 莎訶

爾時世尊說此大力大明呪時衆中所有諸大菩薩四大天王釋梵王等讚言
善哉善哉大悲世尊能說如是過去如來大力神呪爲欲饒益無量衆生竭煩

惱海登涅槃岸除去疾病所願皆滿佛告大衆有淨信男子女人國王王子及以大臣輔相中宮綵女情希福德於此神呪起敬信心若讀若誦若爲他人演說其義於諸含識起大悲心晝夜六時香華燈燭慳重供養清淨澡浴持八戒齋至誠念誦所有極重無邊業障悉皆消滅於現軍中離諸煩惱命欲終時諸佛護念卽於彼國蓮花化生復次曼殊室別東方去此過七兢伽河沙佛土有世界名曰無憂佛號無憂最勝吉祥如來應正等覺今現在得爲衆說法又彼如來所居佛土廣博嚴淨地平如掌皆以寶成細滑柔軟常有香氣無憂苦聲離諸煩惱亦無惡趣及女人名處處皆有金砌浴池香水盈滿寶樹行列華界滋茂勝妙音樂不鼓自鳴譬如西方極樂世界無量壽國功德莊嚴曼殊室利彼佛世尊行菩薩道時發四大願云何爲四

第一大願願我來世得菩提時若有衆生常爲憂苦之所纏逼若聞我名至心

稱念由是力故所有憂悲及諸苦惱悉皆消滅長壽安隱乃至菩提

第二大願願在來世得菩提時若有衆生造諸惡業生在無間黑暗之處大地獄中受諸苦惱由彼前身聞我名字我於爾時身出光明照受苦者由是力故彼見光時所有業障悉皆消滅解脫衆苦生人天中隨意受樂乃至菩提

第三大願願我來世得菩提時若有衆生造諸惡業殺盜邪淫於其現身受刀杖苦當墮惡趣設得人身短壽多病生貧賤家衣服飲食悉皆乏少常受寒熱饑渴等苦身無光色所感眷屬皆不賢良若聞我名至心稱念由是力故隨所願求飲食衣服悉皆充足如彼諸天身光可愛得善眷屬乃至菩提

第四大願願我來世得菩提時若有衆生常爲藥叉諸惡鬼神之所嬈亂奪其精氣受諸苦惱若聞我名至心稱念由是力故諸藥叉等悉皆消散各起慈心解脫衆苦乃至菩提曼殊室利是爲彼佛如來應正等覺所發四種微妙大願

若有衆生聞彼佛名晝夜六時稱名禮敬至心供養於衆生處起慈悲心業障消滅解脫憂苦無病長壽得宿命智於彼佛土蓮華化生常爲諸天之所衛護曼殊室利稱彼佛名能生如是無量福業而彼佛土願力莊嚴殊勝功德聲聞獨覺所不能知唯除如來應正等覺

復次曼殊室利東方去此過八兢伽河沙佛土有世界名曰法幢佛號法海雷音如來應正等覺今現說法曼殊室利彼佛世尊所居國土清淨無穢其地平正玻瓈所成常有光明香氣芬馥以帝青寶而爲城郭有八街道砌以金銀樓閣殿堂飛薨戶牖欄楯莊飾皆衆寶成天香寶樹隨處行列於其枝上掛以天繪復有鈴處處垂下微風動出妙音聲演暢無常苦空無我衆生聞者捨離欲纏習氣漸除證甚深定天妙香華繽紛而下於其四面有八浴池底布金沙水彌滿曼殊室利於彼佛土無諸惡趣亦無女人蓮華化生無復煩惱彼佛如來

行菩薩道時發四大願云何爲四

第一大願願我來世得菩提時若有衆生生邪見家於佛法僧不生淨信遠離無上菩提之心若聞我名至心稱念由是力故無明邪慧日夜消除於三寶所深生正信不復退轉乃至菩提

第二大願願我來世得菩提時若有衆生生在邊地由近惡友造衆罪業不修善品三寶名字曾不經耳命終之後隨三惡趣彼諸衆生暫聞我名由是力故業障消除遇善知識不墮惡趣乃至菩提

第三大願願我來世得菩提時若有衆生衣服飲食臥具醫藥資生所須悉皆乏少由此因緣生大憂苦爲求覓故造衆惡業若聞我名至心稱念由是力故有所乏少隨念皆得乃至菩提

第四大願願我來世得菩提時若有衆生由先惡業共相鬥諍作不饒益弓箭

刀仗互爲傷損若聞我名至心稱念由是力故各起慈心不相傷害不善之念
尙自不生况於前人欲斷其命常行喜捨乃至菩提曼殊室利是爲彼佛如來
應正等覺行菩薩道時所發四種微妙大願若有淨信子女人聞彼佛名至心
禮敬懇勤供養受持念誦業障消滅得不退轉菩提之心具宿命智所生之處
常得見佛無病長壽命終之後生彼國中衣服飲食資生之具隨念皆至無所
乏少曼殊室利彼佛世尊具足如是無量功德是故衆生常當憶念勿令忘
失

復次曼殊室利東方去此過九兢伽河沙佛土有世界名曰善住寶海佛號法
海勝慧遊戲神通如來應正等覺現在說法曼殊室利彼佛如來行菩薩道時
發四大願云何爲四

第一大願願我來世得菩提時若有衆生造衆惡業種植耕耘損諸生命或復

興易欺誑他人戰陣兵戈常爲殺害若聞我名至心稱念由是力故資生之具不假營求隨心滿足常修衆善乃至菩提

第二大願願我來世得菩提時若有衆生造十惡業殺生等罪由此因緣當墮地獄若聞我名至心稱念於十善道皆得成就不墮惡趣乃至菩提

第三大願願我來世得菩提時若有衆生不得自在繫屬於他或被禁繫扭械枷鎖鞭杖苦楚乃至極刑若聞我名至心稱念由是力故所有厄難皆得解脫乃至菩提

第四大願願我來世得菩提時若有衆生造衆惡業不信三寶隨虛妄見棄背正理愛樂邪徒謗毀佛經言非聖說外道典籍恭敬受持自作教人俱生迷惑當墮地獄無有出期設得爲人生入難處遠離正道盲無慧目如是之人若聞我名至心稱念由是力故臨命終時正念現前解脫衆難常生中國受勝妙樂

乃至菩提曼殊室利是爲彼佛如來應正等覺行菩薩道時所發四種微妙大願曼殊室利彼佛國土功德莊嚴與上妙寶如來世界等無有異

復次曼殊室利東方去此過十娑伽河沙佛土有世界名淨琉璃佛號藥師琉璃如來應正等覺曼殊室利彼佛世尊從初發心行菩薩道時發十二大願云何十二

第一大願願我來世得佛菩提時自身光明照無邊界三十二相八十隨好莊嚴其身令諸有情如我無異

第二大願願我來世得菩提時身如琉璃內外清徹光明廣大徧滿諸方焰網莊嚴過於日月鐵圍中間幽冥之處互得相見或於此界暗夜遊行斯等衆生見我光明悉蒙開曉隨作衆事

第三大願願我來世得菩提時以無量無邊智慧方便令諸有情所受用物皆

得無盡

第四大願願我來世得菩提時若諸有情行邪道者悉令遊履菩提正路若行聲聞獨覺乘者亦令安住大乘法中

第五大願願我來世得菩提時若諸有情於我法中修行梵行一切皆令得不錯戒善防三業無有毀犯墮惡趣者設有毀犯聞我名已專念受持至心發露還得清淨乃至菩提

第六大願願我來世得菩提時若諸有情諸根不具醜陋頑愚聾盲瘖瘂攣蹙背偻白癩癩狂種種病苦之所纏逼若聞我名至心稱念皆得端嚴衆病除愈第七大願願我來世得菩提時若諸有情貧窮困苦無有歸趣衆病所逼無藥無醫暫聞我名衆病消散眷屬增盛資財無乏身心安樂乃至菩提

第八大願願我來世得菩提時若有女人爲女衆苦之所逼切極生厭離願捨

女身若聞我名至心稱念卽於現身轉成男子具丈夫相乃至菩提

第九大願願我來世得菩提時令諸有情出魔羅網復有種種邪見之徒皆當攝受令生正見漸令修習諸菩薩行乃至菩提

第十大願願我來世得菩提時若諸有情王法所拘幽禁牢獄枷鎖鞭撻乃至極刑復有衆多苦楚之事逼切憂惱無暫樂時若聞我名以我福德威神力故皆得解脫一切憂苦乃至菩提

第十一大願願我來世得菩提時若諸有情飢火所惱爲求食故造諸惡業若聞我名至心稱念我當先與上妙飲食隨意飽滿復以法味令住安樂乃至菩提

第十二大願願我來世得菩提時若諸有情身無衣服蚊蟲寒熱之所逼惱若聞我名至心稱念隨其所好卽得種種上妙衣服寶莊嚴具伎樂香華皆令豐

足無諸苦惱乃至菩提曼殊室利是爲藥師瑠璃光如來應正等覺行菩薩道
時所發十二微妙上願

藥師瑠璃光七佛本願功德經卷上

音釋

瘡

逆約切
瘡病也

魘魅

魘於琰切
魅明祕切
睡中驚魘人之鬼
怪也

娠

升人切
妊也

讎隙

讎時流切
仇也
隙乞逆切
怨隙也

甃

謨庚切
屋棟也

藥師瓔珞光七佛本願功德經卷上

藥師瑠璃光七佛本願功德經卷下

唐三藏法師義淨奉詔譯

爾時佛告曼殊室利彼藥師瑠璃光如來行菩薩道時所發大願及彼佛土功德莊嚴我於一劫若過一劫說不能盡然彼佛土純一清淨無諸欲染亦無女人及三惡趣苦惱之聲以淨瑠璃而爲其地城闕宮殿及諸廊宇軒牕羅網皆七寶成亦如西方極樂世界功德莊嚴於彼國中有二菩薩一名日光徧照二名月光徧照於彼無量菩薩衆中而爲上首能持彼佛正法寶藏是故曼殊室利若有淨信男子女人應當願生彼佛世界復次曼殊室利若有衆生不識善惡唯懷貪惜不知惠施及施果報愚癡少智無有信心多畜珍財勤勞守護見乞者來心生不喜設不獲已行惠施時如割身肉深生惱惜復有無量慳貪有

情積集資財然於自身尙不能用况當供給父母妻子奴婢僕使及來乞者彼諸有情從此命終生餓鬼中或旁生趣由昔人間曾聞藥師瑠璃光如來名故雖在惡趣還得憶念彼如來名卽於彼沒生在人中得宿命念畏惡趣苦不樂欲樂好行惠施讚歎施者所有財物無慳悋心漸次尙能以頭目手足血肉身分施來求者况餘財物復次曼殊室利若復有人歸依世尊受諸學處而破戒破威儀及壞正見設有持戒正見不求多聞於佛所說契經深義不能解了雖有多聞而懷憍慢由慢心故自是非他嫌謗正法爲魔伴黨如是愚人自行邪見復令無量百千俱胝有情墮大險坑此諸有情墮於地獄傍生鬼趣若曾聞此藥師瑠璃光如來名號由彼如來本願威力於地獄中憶佛名號從彼命盡還生人間正見精進意樂調善捨俗出家於佛法中受持學處無有毀犯正見多聞解甚深義離於憍慢不謗正法不爲魔伴漸次修行諸菩薩行乃至菩提

復次曼殊室利若諸有情慳貪嫉妬造諸惡業自讚毀他命終當墮三惡趣中
無量千歲受諸劇苦從彼終已來生人間或作牛馬駝驢之屬恆被鞭撻飢渴
纏心身常負重困苦疲極若得爲人生居下賤奴婢僕使被他驅役恆不自在
由苦人口中曾聞藥師琉璃光如來名號彼善根力今復憶念至心歸依以佛
神力衆苦解脫諸根聰利智慧多聞恆求勝法常遇善友永斷魔怨破無明殼
竭煩惱河解脫一切生老病死憂悲苦惱乃至菩提復次曼殊室利若諸有情
好喜乖離更相鬪訟惱亂自他以身語意造諸惡業展轉常爲不饒益事互相
謀害告召山林樹塚等神殺諸衆生取其血肉祭祀藥叉羅刹神等書怨人名
或作形像以惡呪術而呪詛之厭媚蠱道呪起死屍令斷彼命及壞其身是諸
有情若得聞此藥師琉璃光如來名號彼諸惡緣悉不能害一切展轉皆起慈
悲利益安樂無損惱意及嫌恨心於自所有常生喜足復次曼殊室利若有四

衆苾芻苾芻尼近事男近事女及餘淨信男子女人若能受持八支齋戒或經一年或復三月受持學處以此善根願生西方極樂世界見無量壽佛若聞藥師瓔璃光如來名號臨命終時有八菩薩乘神通來示其去處卽於彼界種種雜色衆寶華中自然化生或有因此生於天上雖生天中而昔善根亦不窮盡不復更生諸餘惡趣天上壽盡還生人間或爲輪王統攝四洲威德自在勸化無量百千有情於十善道令其修習或生刹帝利婆羅門居士貴族多饒財寶倉庫盈溢形相端嚴眷屬隆盛聰明智慧勇健盛猛有大身力若是女人得聞藥師瓔璃光如來名號至心受持於後不復更受女身復次曼殊室利彼藥師瓔璃光如來得菩提時由本願力觀諸有情遇衆病苦瘦瘡乾消黃熱等病或被魘魅蠱道所中或復短命或時橫死欲令是等病苦消除所求願滿時彼世尊入三摩地名曰滅除一切衆生苦惱旣入定已於肉髻中出大光明光中演

說大羅尼呪曰

南謨薄伽伐帝 鞞殺社窣嚩 薛琉璃鉢喇婆 曷囉闍也 𠵽他揭多也

阿囉喝帝 三藐三勃 陀也 𠵽姪他唵 鞞殺逝鞞殺逝 鞞殺社三沒

揭帝莎訶

爾時光中說此呪已大地震動放大光明一切衆病苦惱皆除受安隱樂曼殊室利若見男子女人有病苦者應當一心爲彼病人清淨澡漱或食或藥或無盡水呪一百八遍與彼服食所有病苦悉皆消滅若有所求至心念誦皆得如意無病延年命終之後生彼世界得不退轉乃至菩提是故曼殊室利若有男子女人於彼藥師琉璃光如來至心懇重恭敬供養者常持此呪勿令廢忘復次曼殊室利若有淨信男子女人得聞如上七佛如來應正等覺所有名號聞已誦持晨嚼齒木澡漱清淨以諸香華末香燒香塗香作衆伎樂供養形像

於此經典若自書若教人書一心受持聽聞其義於彼法師應修供養一切所有資身之具悉皆施與勿令乏少如是便蒙諸佛護念所求願滿乃至菩提爾時曼殊室利童子白佛言世尊我於末法之時誓以種種方便令諸淨信男子女人得聞七佛如來名號乃至睡中亦以佛名令其覺悟世尊若於此經受持讀誦或復爲他演說開示若自書若教人書恭敬尊重以種種華香塗香末香燒香華鬘瓔珞旛蓋妓樂而爲供養以五色繪綵而裹裘之灑掃淨處置高座上是時四大天王與其眷屬及與無量百千天衆皆詣其所供守護世尊若此經寶流行之處及受持者以彼七佛如來本願功德及聞名號威神之力當知是處無復橫死亦復不爲諸惡鬼神奪其精氣設已奪者還得如故身心安樂佛告曼殊室利如是如是如汝所說曼殊室利若有淨信男子女人欲供養彼七如來者應先敬造七佛形像安在清淨上妙之座散華燒香以諸幢幡莊嚴

其處七日七夜受八戒齋食清淨食澡浴身體著新淨衣身無垢濁亦無恚害於諸有情常起利樂慈悲喜捨平等之心鼓樂絃歌稱讚功德右遶佛像念彼如來所有本願讀誦此經思惟其義演說開示隨其所願求長壽得長壽求富饒得富饒求官位得官位求男女得男女一切皆遂若復有人忽得惡夢見諸惡相或怪鳥來集或於其家百怪出現此人若以衆妙資具恭敬供養彼諸佛者惡夢惡相諸不吉祥悉皆隱沒不能爲患或有水火刀毒懸崖險道惡象師子虎狼熊羆蛇蝎蜈蚣如是等怖若能至心憶念彼佛恭敬供養一切怖畏皆得解脫若他國侵擾盜賊反亂憶念恭敬彼如來者所有怨敵悉皆退散復次曼殊室利若有淨信男子女人等乃至盡形不事餘天唯當一心歸佛法僧受持禁戒若五戒十戒菩薩四百戒苾芻二百五十戒苾芻尼五百戒於諸戒中或有毀犯怖墮惡趣若能專念彼佛名號恭敬供養者必定不生三惡趣中或

有女人臨當產時受於極苦若能至心稱名禮讚恭敬供養七佛如來衆苦皆除所生之子顏貌端正見者歡喜利根聰明少病安樂無有非人奪其精氣爾時世尊告阿難言如我稱揚彼七如來名號功德此是諸佛甚深境界難可了知汝勿生疑阿難白言世尊我於如來所說契經深義不生疑惑所以者何一切如來身語意業皆無虛妄世尊此日月輪可使墮落妙高山王可使傾動諸佛所言終無有異世尊然有衆生信根不具聞說諸佛甚深境界作是思惟云何但念七佛名號便獲爾所功德勝利由此不信便生誹謗彼於長夜失大利樂墮諸惡趣佛告阿難彼諸有情若得耳聞諸佛名號墮惡趣者無有是處唯除定業不可轉者阿難此是諸佛甚深境界難可信解汝能信受當知皆是如來威力阿難一切聲聞獨覺等皆不能知唯除一生補處菩薩阿難人身難得於三寶中信敬尊重亦難可得得聞七佛如來名號復難於是阿難彼諸如來

無量菩薩行無量巧方便無量廣大願如是行願善巧方便我若一切若過一劫說不能盡爾時衆中有一菩薩摩訶薩名曰救脫卽從座起偏袒右肩右膝著地合掌向佛白言世尊於後末世像法起時若有衆生爲諸病苦之所逼惱身形羸瘦不能飲食喉唇乾燥目視皆暗死相現前父母親屬朋友知識啼泣圍繞身臥本處見彼琰魔法王之使引其神識將至王所然諸有情有俱生神隨其所作善惡之業悉皆記錄授與彼王王卽依法問其所作隨彼罪福而處斷之是時病人親屬知識若能爲彼歸依諸佛種種莊嚴如法供養而彼神識或經七日或二七日乃至七七日如從夢覺復本精神皆自憶知善不善業所得果報由自證見業報不虛乃至命難亦不造惡是故淨信男子女人皆應受持七佛名號隨力所能恭敬供養爾時具壽阿難問救脫菩薩曰善男子恭敬供養彼七如來其法云何救脫菩薩言大德若有病人及餘災厄欲令脫者當

爲其人七日七夜持八戒齋應以飲食及餘資具隨其所有供佛及僧晝夜六時恭敬禮拜七佛如來讀誦此經四十九遍然四十九燈造彼如來形像七軀一一像前各置七燈其七燈狀圓若車輪乃至四十九夜光明不絕造雜綵旛四十九首并一長旛四十九尺放四十九生如是卽能離諸厄難不爲諸橫惡鬼所持大德阿難是爲供養如來法式若有於此七佛之中隨其一佛稱名供養者皆得如是無量功德所求願滿何況盡能具足供養復次大德阿難若刹帝利灌頂王等災難起時所謂人衆疾疫難他國侵逼難自界叛逆難星宿變怪難日月薄蝕難非時風雨難過時不雨難彼刹帝利灌頂王等爾時當於一切有情起慈悲心放大恩赦脫諸幽厄苦惱衆生如前法式供養諸佛由此善根及彼如來本願力故令其國界卽得安隱風雨順時穀稼成熟國內衆生無病安樂又無暴惡藥叉等神共相惱亂一切惡相悉皆隱沒而刹帝利灌頂王

等皆得增益壽命色力無病自在大德阿難若帝后妃主儲君王子大臣輔相
宮中媵女百官黎庶爲病所苦及餘厄難亦應敬造七佛形像讀誦此經然燈
造幡放諸生命至誠供養燒香散華卽得病苦銷除解脫衆難爾時具壽阿難
問救脫菩薩言善男子云何已盡之命而可增益救脫菩薩言大德仁豈不聞
如來說有九橫死耶由是世尊爲說呪藥隨事救療然燈造幡修諸福業以修
福故得延壽命阿難問言九橫云何救脫菩薩言一者若諸有情得病雖輕然
無醫藥及看病者設復遇醫不授其藥實不應死而使橫死又信世間邪魔外
道妖孽之師妄說禍福便生恐動心不自正卜問吉凶殺諸衆生求神解奏呼
召魍魎請福祈恩欲冀延年終不能得愚迷倒見遂令橫死入於地獄無有出
期二者橫爲王法之所誅戮三者畋獵嬉戲耽淫嗜酒放逸無度橫爲非人奪
其精氣四者橫爲火焚五者橫爲水溺六者橫爲種種惡獸所噉七者橫墮山

崖八者橫爲毒藥斃禱呪詛起屍鬼等之所中害九者飢渴所困不得飲食而便橫死是爲如來略說橫死有屍九種其餘復有無量諸橫難可具說復次阿難彼琰魔王簿錄世間所有名籍若諸有情不孝五逆毀辱三寶壞君臣法破於禁戒琰魔法王隨罪輕重考而罰之是故我今勸諸有情然燈造幡放生修福令度苦厄不遭衆難爾時衆中有十二藥叉大將俱在會坐其名曰

宮毗羅大將

跋折羅大將

迷企羅大將

頰你羅大將

末你羅大將

娑你羅大將

因陀羅大將

婆夷羅大將

簿呼羅大將

真達羅大將

朱杜羅大將

毗羯羅大將

此十二藥叉大將一一各有七千藥叉以爲眷屬同時舉聲白佛言世尊我等今者蒙佛威力得聞七佛如來名號於諸惡趣無復怖畏我等相率皆同一心

乃至盡形歸佛法僧誓當荷負一切有情爲作義利饒益安樂隨於何處城邑聚落空閑林中若有此經流布讀誦或復受持七佛名號恭敬供養者我等眷屬衛護是人令脫衆難所有願求悉令滿足或有疾厄求度脫者亦應讀誦此經以五色縷結我名字得如願已然後解結爾時世尊讚諸藥叉大將言善哉善哉大藥叉將汝等念報七佛如來恩德者常應如是利益安樂一切有情爾時會中有多天衆智慧鮮少作如是念云何過是兢伽河沙諸佛世界現在如來暫聞名者便獲無邊殊勝功德爾時釋迦牟尼如來知諸天衆心之所念卽入驚召一切如來甚深妙定纔入定已一切三千大千世界六種震動雨天妙華及天香末彼七如來見是相已各從其國來至索訶世界與釋迦如來共相問訊時佛世尊由其先世本願力故各自於天寶莊嚴師子座上隨處安坐諸菩薩衆天龍八部人非人等國王王子中宮妃主并衆大臣婆羅門長者居

士前後圍繞而爲說法時諸天衆見彼如來皆已雲集生大希有疑惑便除時諸大衆歎未曾有同聲讚言善哉善哉釋迦如來饒益我等爲除疑念令彼如來皆至於此時諸大衆各隨自力以妙香華及衆瓔珞諸天妓樂供養如來右繞七匝合掌禮敬讚言希有希有諸佛如來甚深境界不可思議由先願力善巧方便共現如是奇異之相爾時大衆各各發願願諸衆生皆得如是如來勝定爾時曼殊室利卽從座起合掌恭敬繞佛七匝禮雙足已白言世尊善哉善哉如來定力不可思議由本願力方便善巧成就衆生唯願爲說大力神呪能令來世薄福衆生病惱所纏日月星辰所有厄難疫疾怨惡及行險道遭諸恐怖爲作歸依令得安隱彼諸衆生於此神呪若自書教人書受持讀誦廣爲他說常蒙諸佛之所護念佛自現身令願滿足不墮惡趣亦無橫死時諸如來讚曼殊室利言善哉善哉此是我等威神之力令汝勸請哀愍衆生離諸苦難爲

說神呪汝應諦聽善思念之我當爲說曼殊室利有大神呪名曰如來定力瓔
璃光若有男子女人書寫讀誦恭敬供養於諸含識起大悲心所有願求皆得
滿足諸佛現身而爲護念離衆障惱當生佛國時七如來一音聲卽說呪曰
咀姪他 具繼具繼 譬尼繼膩咽 末底末底 馭頰怛他 揭多三摩地
頰提瑟恥帝 頰帝末帝 波例波跋輪但你薩婆波跋 那世也 敦
睇勃圖 隔答繼隴讖矩讖 佛鐸器怛羅 鉢里輪但你 曇讖昵曇讖
讖嚕讖嚕 讖嚕尸竭囉 薩婆哥羅 蜜栗覩_丁 尼婆喇你 敦提蘇敦睇
佛陀 頰提瑟佉泥娜 曷略叉覩讖 薩婆提婆 三讖頰三讖 三曼
接奴_切 和漢嚕覩讖 薩婆佛陀 菩提薩埵 苦讖苦讖 鉢喇苦曼 覩讖
薩婆伊底隴波達婆 薩婆毗何大也 薩婆薩埵者脯嚕泥脯嚕泥_去 脯
嚕也讖 薩婆阿舍薛瑠璃也 鉢喇底婆細 薩婆波跋 差揚羯囉 莎訶

爾時七佛說此呪時光明普照大地震動種種神變一時俱現時諸大眾見此事已各各隨力以天香華塗香末香奉上彼佛咸唱善哉右繞七匝彼佛世尊同聲唱言汝等一切人天大眾應如是知若有善男子善女人若王王子妃后大臣寮庶之類若於此呪受持讀誦聽聞演說以妙香華供養經卷著新淨衣在清淨處持八戒齋於諸含識常生慈愍如是供養得無量福若復有人有所祈願應當造此七佛形像可於淨處以諸香華懸繪旛蓋上妙飲食及諸妓樂而爲供養并復供養菩薩諸天在佛像前端坐誦呪於七日中持八戒齋誦滿一千八遍彼諸如來及諸菩薩悉皆護念執金剛菩薩并諸釋梵四天王等亦來擁衛此人所有五無間罪一切業障悉皆消滅無病延年亦無橫死及諸疾疫他方賊盜欲來侵境鬥諍戰陣言訟讎隙飢儉旱澇如是等怖一切皆除共起慈心猶如父母有所願求無不遂意爾時執金剛菩薩釋梵四天從座而起

合掌恭敬禮釋迦牟尼佛足白言世尊我等大眾皆已得聞諸佛本願殊勝功德及見諸佛慈悲至此令我衆生親承供養世尊若於其處有此經典及七佛名陀羅尼法流通供養乃至書寫我等悉皆承佛威力卽往其處擁護於彼國王大臣城邑聚落男子女人勿令衆苦及諸疾病之所惱亂常得安隱財食豐足我等卽是報諸佛恩世尊我等親於佛前自立要誓若有淨信男子女人憶念我者應誦此呪卽說呪曰

咀姪他 要窠莫窠 咀囉窠 麼麼窠具囉 訶呼去 醯去 末囉末囉
末囉 豎樹曬布囉 莎訶

若有淨信男子女人國王王子大臣輔相中宮嫔女誦七佛名及此神呪讀誦書寫恭敬供養現世皆得無病長壽離衆苦惱不墮三途得不退轉乃至菩提彼諸佛土隨意受生常見諸佛得宿命智念定總持無不具足若患鬼瘧等病

當書此呪繫之肘後病若差已置清淨處爾時執金剛菩薩詣七佛所右繞三
匝各申禮敬白言世尊惟願慈悲護念於我我今爲欲饒益未來男子女人持
是經者我今更說陀羅尼呪時彼七佛讚執金剛言善哉善哉善哉執金剛我加護
汝可說神呪爲護未來持經之人令無衆惱所求滿足時執金剛菩薩卽說呪
曰 南麼歎多喃 三藐三佛陀喃 南麼薩婆跋折囉達囉喃 咀姪他唵
跋折 跋折囉 莫訶跋折囉 跋折囉波捨 陀喇你三麼 三麼 三
曼頰 阿鉢喇底 嚧多跋折囉 苦麼苦麼 鉢囉苦曼覩 薩婆何大
也 矩嚕矩嚕 薩婆羯麼阿代喇拏你又也 三麼也末奴三末囉簿伽畔
跋折囉波你 薩婆舍謔鉢哩 脯喇也莎訶
世尊若復有人持七佛名憶念彼佛本願功德并持此呪讀誦演說我令彼人
所願滿足無所乏少若欲見我問善惡者應當書寫此經造七佛像并執金剛

菩薩像皆於像身安佛舍利於此像前如上所說種種供養禮拜旋繞於衆生處起慈悲心受八戒齋日別三時澡浴清淨三時衣別從白月八日至十五日每日誦呪一百八遍心無散亂我於夢中卽自現身共爲言說隨所求者皆令滿足時大會中有諸菩薩皆悉唱言善哉善哉執金剛此陀羅尼不可思議實爲善說時七如來作如是語我等護汝所說神呪爲欲饒益一切衆生皆得安樂所求願滿不令此呪隱沒於世爾時七佛告諸菩薩釋梵四天王曰我今以此神呪付囑汝等并此經卷於未來世後五百歲法欲滅時汝等皆應護持是經此經威神利益甚多能除衆罪善願皆遂勿於薄福衆生誹謗正法毀賢聖者授與斯經令法速滅爾時東方七佛世尊見此大衆所作已辦機緣滿足無復疑心各還本土於其座上忽然不現爾時具壽阿難陀卽從座起禮佛雙起右膝著地合掌恭敬而白佛言世尊當何名此經我等云何受持佛告阿難陀

此經名爲七佛如來應正等覺本願功德殊勝莊嚴亦名曼殊室利所問亦名藥師瑠璃光如來本願功德亦名執金剛菩薩發願要期亦名淨除一切業障亦名所有願求皆得圓滿亦名十二大將發願護持如是名字汝當奉持時薄伽梵說是經已諸大菩薩及聲聞衆天龍藥叉健闥婆阿蘇羅揭路荼緊那羅莫呼洛伽人非人等一切大衆聞佛所說皆大歡喜信受奉行

藥師瑠璃光七佛本願功德經卷下

校訛

第四紙十二行

蠶南藏作蟲

音釋

慳吝

慳丘閑切亦吝也
裕良刃切靳惜也

嫌謗

嫌賢兼切疑也又不平於
心也謗補曠切毀也訕也

嫉妬

嫉昨悉切妬都故切嫉
妬害賢曰嫉害色曰妬

澡漱

澡子皓切洗也
漱先奏切蕩口也
裹裹古火切包裹也
褻褻直質切書衣也
熊熊胡弓切猛獸也
羆羆麋切似熊頭長也
滂郎到切露雨也

比丘惟寬發心施資敬刻此經卷一之四全部

以斯法利回向伏願

四恩普報 三有均資 法界衆生 齊成佛果

大清宣統元年歲次屠維作噩冬月
佛歷二千九百三十六年

常州天寧寺清鎔謹識

藥師琉璃光七佛本願功德經卷下